



REPUBLIKA E KOSOVËS
REPUBLIKA KOSOVA – REPUBLIC OF KOSOVO
GJYKATA KOMERCIALE

Numri i lëndës: 2023:000291
Datë: 06.02.2024
Numri i dokumentit: 05288633

KPPP.nr. 437/23

GJYKATA KOMERCIALE E KOSOVËS, Dhomat e Shkallës së Parë, Departamenti i për Çështje Ekonomike, gjyqtari Arbër Rexha, në çështjen juridike përmbartimore të kreditorit “Victoria Invest Internacional” Sh.P.K, rr. “Brigada 123” Suharekë, kundër debitorit “Emona-Com” me numër të biznesit 70069528 dhe seli në Suharekë, fshati Sallagrazhdë, me bazë përmbartimi sipas titullit ekzekutiv, duke vendosur lidhur me propozimin e kreditorit për përmbartim, jashtë seancës, me datë 06.02.2024, merr këtë:

A K T V E N D I M

- I. Hapet konflikti i kompetencës në mes të Gjykatës Komerciale të Kosovës, Dhomat e Shkallës së Parë, Departamenti për Çështje Ekonomike dhe Gjykatës Themelore në Prizren, Dega Suharekë, Departamenti i Përgjithshëm për të vendosur në çështjen juridike përmbartimore në mes të kreditorit “Victoria Invest Internacional” Sh.P.K, rr. “Brigada 123” Suharekë, dhe debitorit “Emona-Com” me seli në Suharekë, fshati Sallagrazhdë.
- II. Për të vendosur lidhur më konfliktin e kompetencës lënda i dërgohet Gjykatës Supreme të Kosovës.

A r s y e t i m

Gjykata Ekonomike e Qarkut në Prishtinë, duke vepruar sipas propozimit të kreditorit “Victoria Invest Internacional” Sh.P.K, rr. “Brigada 123” Suharekë, me Aktvendimin 759/11, të datës

21.11.2011 ka lejuar përmbartimin ndaj debitorit “Emona-Com” me seli në Suharekë, fshati Sallagrazhdë, për ekzekutimin e borxhit në lartësi prej EUR 153,900.68 sipas titullit ekzekutiv. Ndaj këtij aktvendimi, debitori ka paraqitur kundërshtim, ndërsa Gjykata Ekonomike e Qarkut, me Aktvendimin E.nr. 759/2011, të datës 08.12.2011, e ka refuzuar si të pabazuar kundërshtimin e debitorit. Debitori ndaj aktvendimit në fjalë ka paraqitur ankesë, ndërsa Gjykata Supreme e Kosovës me Aktvendimin Ae.nr. 1/2012, të datës 13.11.2012 e ka refuzuar ankesën e debitorit si të pabazuar.

Kjo lëndë, më pas ka kaluar në Gjykatën Themelore në Prishtinë, Departamenti për Çështje Ekonomike, e cila gjykatë me Aktvendimin E.nr. 759/11, të datës 31.03.2016, është shpallur jokomptente për të ndërmarr veprime në këtë çështje përmbartimore, ndërsa lënë e ka dërguar në Gjykatën Themelore në Prizren, Dega Suharekë.

Gjykata Themelore në Prizren, Dega Suharekë, me aktvendimin Cp.nr. 190/16, të datës 05.01.2023, është shpallur jo kompetente për të vendosur në këtë çështje përmbartimore, ndërsa lënda i është dërguar Gjykatës Komerciale në Prishtinë, si gjykatë kompetente për të procedura në këtë çështje përmbartimore.

Dhomat e Shkallës së Parë të Gjykatës Komerciale, Departamenti për Çështje Ekonomike, gjatë shqyrtimit paraprak të lëndës gjeti se çështja e cila është objekt i saj përfaqëson çështje për vendosjen e së cilës kjo gjykatë nuk ka kompetencë lëndore, por që për vendosjen e kësaj çështje është kompetente Gjykata Themelore Prizren, Dega Suharekë, Departamenti i Përgjithshëm, për arsyet si në vijim:

Kompetenca e Gjykatës Komerciale në çështjet përmbartimore është e rregulluar me nenin 13 të Ligjit nr. 08/L-15 për Gjykatën Komerciale, me të cilin në paragrafin 1, pika 1.2 përcaktohet se: *“Gjykata Komerciale është kompetente për të gjykuar, dhe ka juridiksion ekskluziv për të gjykuar, në Dhomat e Shkallës së Parë dhe Dhomat e Shkallës së Dytë: 1.2. : të gjitha mjetet juridike, siç përcaktohet me ligjin e aplikueshëm për procedurën përmbartimore, për çështje brenda kompetencës të kësaj gjykate.”*

Ndërsa, mjetet juridike në procedure përmbartimore, konform ligjit të aplikueshëm, Ligji nr. 04/l-139 për Procedurën Përmbartimore (tutje: LPP) janë te përcaktuara në nenin 67, sipas të cilit në paragrafin 1 përcaktohet se: *“Në procedurën përmbartimore, mjetet e rregullta të goditjes janë: 1.1. Prapësimi dhe 1.2. Ankesa,”* ndërsa me nenin 68 të po të njëjtit ligj, përcaktohen Mjetet e

jashtëzakonshme juridike, ku decidivisht përcaktohet se: *“1. Nuk është i lejuar revizioni dhe përsëritja e procedurës në procedurën përmbarimore. 2. Kthimi në gjendjen e mëparshme është i lejuar vetëm në rastet e mos ruajtjes së afateve për paraqitjen e prapësimin dhe ankesës kundër vendimeve të përmbarueshëm për përmbarimin me dhunë.”*

Në rastin konkret, lënda e cila është transferuar në këtë gjykatë ka për objekt caktimin dhe zbatimin e përmbarimit sipas propozimit për përmbarim të kreditorit, ndërsa nuk ka për objekt shqyrtimi mjetet juridike në procedurë përmbarimore të përcaktuara në nenin 67 dhe 68 të LPP-së, pasi që urdhri mbi lejimin e përmbarimit ka marr formë të prerë. Andaj, në mungesë të mjetit juridik, në kuptim të dispozitave nga neni 13, pika 1.2 të Ligjit për Gjykatën Komerciale, kjo gjykatë nuk ka kompetencë për vendosje në këtë çështje përmbarimore.

Duke marrë parasysh faktin se objekt në këtë çështje përmbarimore është zbatimi i urdhrin përmbarimor të formës së prerë nga gjykata si organ përmbarues, ndërsa në shkresa të lëndës nuk ka ndonjë mjet juridik për të cilin Gjykata Komerciale do të ishte e kompetencës për të vendosur, kjo gjykatë vlerëson se pikërisht Gjykata Themelore Prizren, Dega Suharekë, Departamenti i Përgjithshëm, është gjykatë kompetente për vendosje në këtë çështje përmbarimore, kjo në mbështetje edhe të dispozitave nga neni 5 i LPP-së.

Nga sa më sipër, në kuptim të nenit 24 dhe 25.2 të Ligjit për procedurën kontestimore, lidhur me nenin 17 të Ligjit për procedurën përmbarimore, u vendos si në dispozitiv të këtij aktvendimi.

GJYKATA KOMERCIALE E KOSOVOËS

Dhomat e Shkallës së Parë, Departamenti për Çështje Ekonomike

KPPP.nr. 437/23, datë 06.02.2024

Gjyqtari
Arbër Rexha

KËSHILLË JURIDIKE: Kundër këtij aktvendimi nuk është e lejuar ankesa.